

Parlamentario Sue-Ann Ras a anuncia su retiro for di Parlamento y politica



ORANJESTAD – Parlamentario Ras a divulga un video uzando e pagina di Facebook di e fraccion di su partido, unda di un manera masha conmovi, el a referi na e incidente reciente cu a pasa cune na Hulanda, relaciona cu e video unda e ta wordo graba mirando un pelicula di Netflix den pleno reunion di IPKO.

E parlamentario aki a haci honor di su mes pa pidi su retiro. E ta haya cu esaki ta e miho decision cu e por tuma ta, entrega su asiento bek como parlamentario na disposicion di e partido MEP. Ta keda pendiente si directiva y consejo di partido MEP lo honra e peticion di Ras, di pone su stoel den nos organo legislativo na consideracion

di nan; y si Ras no lo reconsidera su retiro.

E forma con Ras a expresa su mes, ta sugeri cu su decision ta uno consciente y irrevocabel; y cu eventualmente e no lo hala atras. El a pidi tur hende pa respecta su decision, privacidad, y e ta desea di cera e capitulo aki.

Tambe el a prefera di abstene

di contesta pregunta formula na su direccion; y cualkier aclaracion of pregunta, e ta remiti esaki pa partido MEP. Ya caba presidente di partido MEP, Hendrik Tevreden, a duna ayera declaracion na prensa riba e procedura cu lo tuma despues den seno di partido, unabes cu e anuncio cu su colega di fraccion, Ras a haci di su retiro a wordo conoci.

Ras a cualifica e echo aki como uno fastioso, hopi bergonsoso, cu a crea un momento incomodo no solamente pa su persona, sino pa su famia, y su partido. Pero tambe cerca su sostenedonan cu a pone nan confiansa den dje. “Mi a haci algo sin pensa. Y awor mi mester carga e consecucionan y responsabilidad. Pa esaki mi ta pidi boso mi mas sincero dispensa y di curason,” el a expresa den un video di casi 4 minuut.

Den dje, e ta reconoce cu a ‘comete un error barbaro’. Un punto cu sigur ta laga un reflexion atras, specialmente den mundo politico, ta cu e ta spera cu su error por sirbi como un norma di con un hende den e funcion aki tin

cu actua den futuro, ora cu e ta comete un fayó. Aunke e ta haya cu no a comete nada ilegal of contra ley, y te hasta por a hala esaki un banda y sigui pa dilanti.

Sinembargo, Ras ta haya cu e mes no ta sinti comodo p’esey mes. El a bisa bon cla cu e lo por ta retirando di politica; pero e lo sigui vigila, y unda cu por e lo sigui aporta cu ‘mi granito di arena’ pa mehora cion di enseñansa y tereno social. E ta lamenta cu su bida politico tabata asina cortico y cu e no por a termina tur su trabou den parlamento; pero e lo haci tur intento pa sigui for di pafo.

E decision di Ras a genera reaccionnan mixto. Di un banda ta elogia y aplaudi e decision nada facil cu el a tuma, principalmente si partido MEP ta boga pa integridad den politica y maneho gubernamental. Pero di otro banda, ta considera cu e decision di dje tabata uno mucho radical, considerando cu tin politiconan a yega di comete foutnan mas grandi y ainda nan t’ey, keto bay.

Directiva y Consejo di Partido MEP lo trata e renuncia di Sue-Ann Ras

ORANJESTAD – Bistiendo su pechi como Presidente di partido MEP, Parlamentario Hendrik Tevreden a declara cu nan lo atende debidamente den seno di partido parlamentario Sue-Ann Ras su renuncia.

Den su funcion di presidente di MEP, Tevreden tin e tarea segun statutenan di partido MEP di cuminsa cu e proceso aki. Segun presidente di MEP, nan ta haya e retiro di nan colega ‘algo hopi pisa.’ Unabes cu nan ta termina e proceso, nan lo divulga dilanti di prensa pa asina trece mas claridad riba e pasonan cu a wordo tuma y kico nan a dicidi den consejo y directiva di partido.

Prome cu el a bin cu su declaracion, Tevreden a presenta e video cu tabata e via cu Ras a uza pa anuncia su decision di retiro for di Parlamento y politica. Presidente di MEP a bisa cu den e video aki nos por mira cu su colega ta hopi kibra pa locual

a sosode na Hulanda, ora cu el a wordo graba mirando un pelicula den pleno reunion inter parlamentario di Reino (IPKO).

Den nomber di su partido, e ta desea forsa y solidaridad pa su futuro. Nan ta sostene su colega den su decision. Tevreden a pidi pa pueblo duna su colega e espacio y tempo pa e por deal cu e situacion cu e ta pasando aden. Nan start e proceso riba Ras su solicitud di pone disponibel y na disposicion di su partido, su stoel den parlamento; y pronto lo duna di conoce kico lo ta e decision final. E no ta descarta cu den dado caso, directiva y consejo di partido MEP por acerca Ras pa reconsidera su peticion di retiro. Pero esaki ta parti di e proceso cu ta habri ainda y cu ta cuminsa awor.

Sinembargo, e ta considera pa trece un transparencia riba e caso di Ras, ya cu e caso aki mester wordo mira den su contexto y totalidad. El a trece dilanti cu su colega, hunto cu

e otronan cu a bay reunion di IPKO, tabatin un siman basta pisa. Pero den su caso tambe e mester atende cu e perdida di un familiar, unda e mester percura pa tur arreglo cu mes-

ter tuma luga.

E tin di bisa cu Ras a muestra grandesa di admiti su error, y el a tuma e pasonan cu ta cuadra cu esaki. Ya cu e ta para pa in-

tegridad, y e ta reconoce cu locual el a haci tabata un error. Nan ta spera cu e decision di Ras por ta un ehempel pa politica den general y tambe pa nos comunidad.

